



A Toulouse e Montauban, duas citads dal «Midi» franzos a nordvest dal Mar mediterrann, ha la mazzacrà da set personas ed ina ferì grevamain laschè enavos bleras dumondas.

KEYSTONE

Mazzacras agitan la Frantscha

Set unfrendas en il «Midi» franzos

■ (gsc) A Toulouse (444 000 olmas) e Montauban (58 000 olmas), duas citads dal «Midi» franzos a nordvest dal Mar mediterrann, han ins mazzacrà set personas e ferì grevamain in'otgavla; lur ha il morder presumtiv resistì cun armas da feu a la polizia, ferind grevamain in um. Finalmain è'l mort en il cumbat, persvas d'esser in «mudschahidin», in martir dal «dshihad» islamic. I suonda in sguard enavos sin quels dudesch dis, da l'emprim mazzament ils 11 da mars enfin a la mort dal terrorist presumtiv ils 22, giond davos las culissas ed examinond las consequenzas areguard l'elecziun dal president da la republica franzosa, ils 22 d'avrigl e 6 da matg 2012.

Schuldads oriunds d'anteriuras colonias

L'emprim deschi da far endament en malencurada las unfrendas. Ils 11 e 15 sa tractava da trais giuvens paracadaders en mandura, pia commembers da truppas franzosas d'elita. Lur fatschas tradivan cleramain lur derivanza araba u berba. In d'els era catolic, tschels eran muslims. Il morder ha anc sajettà a Montauban sin in paracadader che derivava dal «département» Guadeloupe en las Antillas franzosas, pia fitg probablmain da pel naira: «Il procuratur da Paris ha declerà ch'ina culla haja taglià il magugl dal dies sin il stgalim dals spinals dal culiez» («Le Monde» dals 22, p. 6): Il ferì pudess pia survivor mo sco impedì. I para ch'il mazzacrader haja vulì tutgar ertavels dal passà colonial franzos. La «Frankfurter Allgemeine Zeitung» («FAZ») dals 23, p. 31: «Gist ussa fan ins far endament la guerra d'Algeria (v. era p. 34), il terrorismem d'ina giada e dolurs-fantoms colonialas.» Lez conflict è vegnì a fin ils 18 da mars cun las cunvegns d'Evian (v. La Quotidiana dals 13 da mars). P. 34 dal medem numer da la «FAZ» scriva il schurnalist e scriptur franzos Olivier Guez: «I cumpara puspè quai ch'ins ha supprimì: Il model d'assimilaziun republicana va en duvas, cun l'Europa, la globalisaziun, la decentralisaziun, ed ils mitus nazionalis sa dissolvon (...). Individus e minoritads pretendan in'atgna identitad (...). Tschinquanta onns suenter Evian (...) resta l'ierta algeriana supprimida preschenta dapertut (...). Quai mussan las debattas mulestusas davart l'identitad e la ricla naziunala (...). En Frantscha furiescha anc adina l'utschac da la guerra d'Algeria.» Ils 31 a Toulouse ha lieu ina manifestaziun a favur da l'occitan, il vegl linguatg dal «Midi»; in'atra ha lieu il medem di a Strassburg ha lieu

per «tuts linguatgs regiunals da Frantscha, cunzunt il tudestg standard e ses dialects alsazians e lorenais».

Al portal d'in gimnasi giudaic

Ma era la mort ha puspè furià a Toulouse. Ils 19 ha in um mazzà trais uffants ed in magister gimnasial, tuts quatter da confessiun giudaica. Dus dals uffants spetgavan il bus per ir a la scola giudaica «Gan Rachi». «Le Courrier» (Genevra) dals 20 rapporta: «Ils duatschient scolaras e scolaras dal gimnasi 'Ozar Hatorah' spetgan avant il portal (...). Tut è pashaivel. Ma tuttenina vegn il snuizi. In um descenda da ses scooter, (...) prenda or in'arma 8 mm e sajetta magister Jonathan e ses dus figls da 3 e 6 (...). Da sang fraid va'l vinavant, trond sin uffants ed umans creschids. El blessa grevamain in giuven da 17» (p. 9). Lura mazzà'l ina mattetta che curriava tras il plaz; sin quai è'l fugì sin ses scooter Yamaha. Il magister, rabin Jonathan Sandler, derivava d'ina famiglia tudestga emigrada 1938 en Frantscha. El instruiva religiun al gimnasi. «Ins l'aveva schizunt supplitgà d'instruir er a Bordeaux, nua ch'el leva ir glindesdi saira» («Le Monde», 22 da mars, p. 7). Suenter la mazzacra davant il gimnasi, filmada da las cameras sur il portal, ha la polizia percurschì il context cun il mazzament dals paracadaders: Era lur morder cumpariva cun in scooter Yamaha. «Le Courrier» dals 21 da mars rapporta: «La polizia responsabla da las retschertgas è persvasa: Lez uman saja ordvart resolut, sappia ch'el vegn persequità e possia mazzar puspè» (p. 11). La tema reveva.

Il suspect fa da grond

Finalmain han ins identifitgà il terrorist presumtiv ch'ins ha lura bloccà en sia abitaziun da Toulouse, sia citad nativa. Igl era Mohammed Merah (23), Franzos da derivanza algeriana. «Le Courrier» dals 22 rapporta: «Il suspect principal areguard il mazzament da set unfrendas ha tractà cun ils polizists che bloccavan sia immobiglia. El è sa declerà autur da quels acts, sa referind ad Al-Qaida e punctuond ch'el haja 'fatg ir la Frantscha en schanuglias' ed agì mintga giada sul sulet. I ha dà pliras sajettadas cun l'unitad d'elita che tractava cun el; (...) el ha ferì trais polizists e tutgà la chaplina d'in quart (...). François Molins, procuratur public da Paris, (...) ha declerà a Toulouse: 'Quai ch'el deplorescha è mo ch'el n'haja betg gi peda da mazzar dapli gliued (...). Tenor Claude Guéant, minister da l'intern, ha il morder presumtiv

anc ditg ch'el haja 'surpiglià in'incumbenza generala d'Al-Qaida per in attentat en Frantscha'. Tenor Molins ha Merah plinavant declerà ch'el planiseschia da mazzar dus polizists ed in militar, per vinditgar la mort da Palestinais en il conflict cun l'Israel e chastiar la Frantscha per sia interenziun armada en Afganistan» (p. 7). Al-Qaida cumbatta «cruschads e gidieus».

Sa fatschentar cun ils spierts da la guerra algeriana

Da Merah san ins ussa bler. «2006 e 2007 èn ses delicts penals s'augmentads, en total deschedotg. En ina banca ha'l stratg ina tastga or da maun ad ina clienta. Perquai è'l vegnì sentenzià a deschedotg mais prashun senza temp da prova. En la prashun è ses islamissem vegnì radical. Dadietg enconusch'ins ils stabiliments franzos d'arrest sco lieus privilegiads per derasar l'islamissem extrem (...). Per avrigl 2012 aveva'l in termin avant derschader (...). Procuratur Molins ha declerà che Merah haja filmà tut ses acts cun ina camera; ils investigaders èn en possess dals films» («FAZ» dals 21 da mars, p. 2). Ussa na po'l betg pli dar pled e fatg avant derschader. Tgi sa sch'i vala anc adina per el il princip giuridic fundamental da la presumziun d'innocenza? Art. 6.2 da la Convenziun europeica dals dretgs umans tuna: «Mintga persuna accusada d'in fatg penal vala sco innocenta enfin che sia culpa saja cumprovada legalmain.» Dentant vegn il frar pli vegl da Merah accusà da cumplicitad tar las mazzacras da Toulouse e Montauban. L'immigraziun e la segirtad vegnan temas centrals dal cumbat electoral. Quai favurisescha president Nicolas Sarkozy sco candidat: Tar l'emprim scrutini duess el survegnir 28,5% da las vuschs cunter 27% per ses rival socialist François Hollande. Quai munta in segund scrutini tranter ils dus. Ma nua giessan lura las 16% da Marine Le Pen (Front naziunala) e las 12% da Jean-Luc Mélançon (sanestra extrema)? Ils sondagis prevesan ina victoria da Hollande per ils 6 da matg (54 encunter 46% da las vuschs). Perquai prova Sarkozy da prender davant vuschs a Le Pen cun decleraziuns populistas. Ils 22 da mars advertiva l'editorial da «Le Monde»: «Ils islamists extremists vulan propi impedir la Frantscha d'esser la Frantscha e l'Europa d'esser l'Europa en lur diverscha e lur tradiziun da toleranza (...). I fiss in sbagl fatal da ceder a quel squitsch.» Ma la Frantscha duai sa fatschentar avertamain cun ils nauschs spierts da la guerra algeriana.